



21. august 2015

UPA 2015/50

Inatsisartut Suleriaasianni § 33 naapertorlugu aalajangiiffigisassatut siunnersuut imattoq matu-muuna saqqummiuppar:

**Atuartut ilinniarfinnut ingerlaqqinnissaminni periarfissarissaarnerunissaat qularnaarumallugu sapinngisamik kommunit suleqatigalugit meeqqat atuarfiini tamani atorfimmut tulluuttumik atuarfinni siunnersortit pikkorissartinneqartalernissaannut suliniuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Randi Vestergaard Evaldsen, Demokraatit)

### **Tunngavilersuut**

Oqartariaqarpungut inuusuttut amerlavallaat kukkullutik ilinniagassaminnik toqqaasartut suli. Tamanna ersarisisarpoq nunami ilinniarnertuunngorniarfinni ilinnialersut qassit ikerinnakkut atuarunnaartarnerat qiviaraanni. Inuaqatigiit ataatsimut isigalugit kiisalu minnerunngitsumik inuusuttut ataasiakkaat isigalugit kusanarpoq inuusuttut amerlanerpaartaat aallaqqammut ilinniagassaminnik eqqortumik toqqaasarmata.

Ullumikkut siunnersuineq meeqqat atuarfianni ingerlanneqartarpoq, sinerissami meeqqat atuarfiini atorfearlutik siammarsimasut siunnersortit atorlugit. Taakku suliaat qitiulluinarpooq, taakku meeqqat atuarfiini atuartunut ilinnialersussanut siunnersuisarmata. Demokraatini taamaattumik kissaatigaarput, atuartut ilinniarfinnut ingerlaqqinnissaminni periarfissarissaarnerunissaat qularnaarumallugu meeqqat atuarfiini tamani atorfimmut tulluuttumik atuarfinni siunnersortit pikkorissartinneqartalissasut piginnaanngorsarlugit kiisalu atuarfinni siunnersortit ilinniartitaanerup iluani tamarmi ilinniarfissatut periarfissanut ilisimasaqalernissaat qularnaarumallugu. Taamaasillutik inuusuttut siunissartik pillugu pitsaanerusumik paasitinneqartalissagaluarput. Qaammarsaaneq paassisutissiinerlu eqqortumik toqqaanissamut aqqutaapput siullit. Aamma inuusutorpassuit ernummatitigut ajorsartutullu misigisimanissaraluannut oqilisaavigineqassagaluarput kiisalu inuaqatigiit arlalitsigut aningaasartuutitigut sipaaruteqartinneqassagaluarput.

Pingaaruteqarpoq atuartut efterskolemi, GU-mi HTX-mi il.il atuareernerup kingorna inuussutissarsiutigiligassaminut, universitetimut il.il ingerlariaqqinnissartik pillugu siunnersorneqartarnissaat aamma naggataatigut suliffissatigut periarfissat pillugit. Minnerunngitsumik aamma siunnersorneqartariaqarput atuartup toqqarniagai sunik siunertaanngitsunik kinguneqarsinnaanerini pillugit.

Taamaaliornikkut qularnaassavarput inuusuttut meeqqat atuarfianniilli eqqortumik siunnersorneqarnissaat. Aamma peqataanik qularnaassavarput atuartut sunissaminnik nalusut isumassarsiortarnissaat.

### **Pisortanut aningaasaqarnikkut allaffissornikkullu kingunerisassai.**

Demokraatinin nalilerparput peqataasup ataatsip ullormut pikkorissarnera, ineqarneq ilanngutereerlugu agguaqatigiisillugu 20.-25.000 koruunit missaani akeqartassasoq. Suliamut tunngasumik pikkorissarneq ullunik marlunnik sivisussuseqarsinnaassasoq tagginneqarpoq. Tamatuma saniatigut naatsorsuutigineqassaaq peqataasut angalanerannut aningaasartuuteqartarnissaq immaqa 5.000 koruunit missaanni inummut ataatsimut. Namminersorlutik Oqartussat sulisuminnik namminneq pikkorissaasarsinnaanissaat naliliinermi tunngaviuvoq kiisalu aamma atuarfinni siunnersortit ataatsikkut pikkorissartinneqartarnissaat.

Suliffeqarnermi illuatungeriit atuarfinni ataasiakkaani atuartut amerlassusaat tunngavigalugit atuarfimmi siunnersortinik atorfinitisarneq pillugu isumaqatigiissutaat tunngavigalugu, nalilerneqarpoq Kalaallit Nunaanni 22-t missaanni atuarfinni siunnersorteqassasoq.

Taamaasilluni tagginneqarpoq siunnersuut annerpaamik 1.320.000 koruunink aningaasartuutitaqassasoq. Naalakkersuisut allamik isumaqassagaluarpata Naalakkersuisut qinnuigissavagut siunnersuutip siullermeernissaanut akissuteqarnerminni ilisimatitseqqullugit.

Piffissaq qaninnerusoq isigalugu siunnersuut inuiaqatigiit aningaaarsiornerannut iluaqusiissaaq, qulakkeerneqartussaammat atuartut amerlanerit siullermeernerminni eqqortumik ilinniagassaminnik toqqaasalernissaat taamaasillutilu ilinniakkaminnik naammassiarnerusalissallutik.

**Inuuussutissarsiornermut aningaasaqarnikkut allaffissornikkullu kingunerisassai.**

Soqanngilaq

**Innuttaasunut aningaasaqarnikkut allaffissornikkullu kingunerisassai.**

Naatsorsuutigisariaqarpoq aallaqqaataaniik inuusuttut ilinniarneranni siunnersuisarnerup ikerinnakkut ilinniarunnaartartut ikilisikkumaarai aamma ilinnialivinneranni. Tamatuma kingunerissavaa inuusuttut annasakinnerusalernissaat kiisalu aamma suliliaarnerusalernissaat, aamma ataasiakkaat inuunermanni isertitaannut qaffassaataasumik.